

Paur Kute Texarônikakam me jamã pi'ôk kumrêx no'ôk ne ja.

Paurmê ikjêbê Xira krî nhidjibê Pirpukam bôx ne mekmã Jeju jarê. Nhym me kwỳ kum Jeju'ã ujarênh mar prãm kêt ne prîne aro ajkên kam Ar kubê ijê. Nhym akati nhym me ajte bôm ar kumê nhym ar mã me kurûm tẽ. Mã me kurûm tẽn kam krîbê Texarônikakam bôx ne ajte mekmã Jeju jarê. Nhym me kwỳ rax ne tu Jejuo aminhõ. Nhym kam mekbê idjaer ajte mekmã ar kurêtuw. Nhym kam Paur krîbê Texarônika kurûm tẽ. Tẽn atemã krî 'ôkam bôx. Nhym Texarônikakam ar kute Jejuo aminhõja arek abeno bikprônho dja. Nhym Paur ar kurûm tẽn aro aman te akubyn ar'ỳr tẽn prãme ne kam Ximoxi ar'ỳr ano. Texarônikakam ar kute Jejuo aminhõja kute arek Jeju kabênkôt ar amijo ba rã'ã jabej kute ar omũnhmã ar'ỳr ano.

Nhym Ximoxi ar'ỳr tẽn bôx ne ar omũn kam akubyn Paur'ỳr tẽ. Akubyn tẽn bôx ne Paurmã ar arê,

—Ăm arkum Jeju kînhkumrêx. Onĩj ar arek Jeju kabênkôt ar amijo ba, ane. Nhym kam Paur kuman kam kînhkumrêx ne arkum pi'ôk no'ôk. Mỳj'ã ne Paur pi'ôk no'ôk? Bir, Paur kurê djwỳnh ne Paur'ã kabên ne. Nãm me,

—Paur ne me amã 'êx. Nãm me amã akubyn tẽmmã amijarê. Nãm 'êx. Nãm arĩk ar ba. Me bôx kêtja pumũ, ane. Nãm ã Paur kurê djwỳnh 'ã kabên ane. Nhym Texarônikakam ar ja arỳm me tyk jabej Paur kukij. Ne kam ajte Jeju akubyn bôx jabej kukij nhym Paur ja kunĩ'ã pi'ôk no'ôk ne. Tãm ne ja.

1 ¹Ba ibê Paur ne ba ar amã pi'ôk no'ôk ne. Xiramê Ximoximê ne bar ar amã pi'ôk no'ôk ne. Krĩraxbê Texarônikakam ar aje amim Jeju mar ne kôt aben pydjiwãmã ne bar pi'ôk no'ôk ne. Metĩndjwỳnhbê ar Babãm ne kam krabê Bẽnjadjwỳr Jeju Kritu arkôt ne gar aben pydji, ar amã ne bar pi'ôk no'ôk ne.

Gê Metĩndjwỳnh ar ajo djuw mex, Metĩndjwỳnhbê gwaj Babãmmê Bẽnjadjwỳr Jeju Kritu ar ukaprikôt ar ajo djuw mex ne ar ar ajo ba ne ar amã umar mex jarê gar adjumar mex ne ar aba.

Paur kute Metĩndjwỳnhmã arkam amikĩnh jarênh.

²Nã bãm ar Metĩndjwỳnhmã ar akam ikĩnhkumrêx jarê ne kum ar ajarênh 'ãno dja. ³Mỳkam ne bar ar akam ikĩnh? Bir, ar aje tu amim Jeju markumrêx

ne arÿm kôt aje amijo abakam ne bar ikĩnhkumrêx. Ne ajte ar amã Metĩndjwÿnh jabêkôt arÿm kum adjapênh raxkamdjwÿ ne bar ikĩnhkumrêx. Ne ajte ar aje arÿm Jeju Kritu jabej mã adjumarkamdjwÿ ne bar ikĩnhkumrêx. Gwaj banhô Bẽnjadjwÿr Jeju Kritu akubyn bôxmã ar aje mã abej ajkam amakkamdjwÿ ne bar ikĩnhkumrêx. Kam ne bar ar akam ikĩnhkumrêx ne gwaj Babãmmã ar ajarê, gwaj banhô Metĩndjwÿnhbê gwaj Babãmmã ar ajarê.

⁴Akmere ar, àpnhĩre ar, mrãmri ne arÿm Metĩndjwÿnh kum ar ajabêkôt arÿm amijo ar apytà. Kute ar ajo kra kadjy amijo ar apytà bar arÿm kuma.

⁵Djãm Jeju'ã ar amã idjujarênh nyja kabên kajgo got? Kati. Mrãmri ne ba ar amã Jeju'ã idjujarênhkumrêx ne. ãm Metĩndjwÿnh pyma kôt ne bar mã ar amã Jeju kabên jarê. Djãm ar ba ne bar ar amã ikabên jarê? Kati, ãm Metĩndjwÿnh Karô kabênkôt ne bar ar amã ikabên jarê. ãm Metĩndjwÿnh kabênja ne kajgo kêt. ãm 'êxnhĩ kêt. Tãm ne bar mã kuman ar amã arê.

Nã bãm ar ar akam imexkumrêx ne akràn mã ar ar ajo iba. Gar arÿm prĩne ar ipumün tu amim ar ikabên markumrêx. ⁶Ar ikabên man ar ijã amijakren Bẽnjadjwÿr Jeju'adjwÿ arÿm amijakre. Ar ijã amijakren mã ar ikôt amijo aba. Nhyam kam me ar ajo ajkê. Ar aje Jeju markam ne me ar ajo ajkê. Nãm me te ar ajo ajkê gar mã ajamako ar ikabên mar tÿx mex ne. Ne tu ate akràn tu akĩnhkumrêx ne. Nã gãm ar Metĩndjwÿnh Karô kabênkôt tu akĩnhkumrêx ne mã ar ikabên ma.

⁷Nhyam arÿm Akajakam ar kute amim Jeju marjamê Matenikam ar kute amim Jeju marja me kunĩ arÿm ar apumũ, ar aje Jejukôt ar amijo aba pumün arÿm ar ajã amijakren kute ar apyràk ne ar ba. ⁸Ê, ar ga ne gar memã Jeju'a ajarê nhyam Akajakam ar jamê Matenikam ar jamê ne me arÿm kunĩ Bẽnjadjwÿr Jeju'a adjujarênh ma. Djãm me ajbit ne me kuma? Kati, nã gãm ar me kunĩ mã arê nhyam me arÿm kuman kam arÿm amũ aben mã arê. Nhyam me arÿm prĩne kuma. Nã gãm ar aje amim Metĩndjwÿnh marja memã amijarê nhyam me arÿm prĩne kuma ne kam amũ aben djô'ã aben mã ar ajarê. Nhyam kam pyka kunĩkôt me arÿm ar ajarênhbit ma. Kam ne bar ije arÿm memã ar ajarênh kêt.

⁹Me ja ta ne me ar imã ar ajarê. Me ja ta ne me ar imã,

—Be, onij Texarônika kam ar ja ne arkum ar akĩnhkumrêx. Be, ga ar abôxkam ar kute ar amã kabên mexbit jarênhja ma, ane. Ne ajte ar imã,

—Be, Texarônika kam ar ja ne ar arÿm mÿjjao we Metĩndjwÿnh karô nhípêxja kangan arÿm Metĩndjwÿnhkumrêx, Metĩndjwÿnh tĩnjao aminhõ. Ar kute amikadjy kum àpênh mã ne ar o aminhõ, ¹⁰ne arÿm krakam amako dja. Metĩndjwÿnh kra ne ar arÿm amiwÿr kam amako dja, ane.

Nãm me ã ar ajarênh o ane. Mrãmri ne gar Metĩndjwÿnh krabê Jejukam ama. Tãm ne tykkam Bãm ajte akubyn o tĩn ne. Tãm dja ajte kàjkwa kurũm bôx. Tãm ne gar kam ama. Tãm ne kubê gwaj bapytâr djwÿnh ne Metĩndjwÿnh ngrykbê gwaj bapytã. Godja Metĩndjwÿnh me axwekam ngryk ne. Bãm ngrykbê godja Jeju arÿm gwaj bapytã. Tãm ne bôxmã gwaj kam ama.

Paur arkam àpênh mex.

A Kô 1.12

2 ¹Akmere ar, àpnhîre ar, wânh ar ar akam idjâm ne kajgo kêtkumrêx. Gar arÿm ama. ²Ar awÿr ar imôr kêtri ne me Pirpukam prîne ar ijo ajkên ar imâ kabên punu jarê. Gar arÿm ama. Nâm me ja te ar ijo ajkê bar ar amâ Metîndjwÿnh'â idjujarênh ny jarênh rã'ã ne. Metîndjwÿnh ne ar imâ tÿx jadjà bar itîn prâm kêt ne tu ar amâ arê. Nâm me te Metîndjwÿnh'â ar amâ ar idjujarênhkôt kum ar ikurê bar mã ar amâ arê.

³Nã bãm ar ar amâ,

—On ar tu amim Jeju markumrêx, ane.

Djâm kupa'ã ne bar ar amâ arê?

Nâr djâm mÿjja 'ô prâme ne bar ar amâ arê?

Nâr djã nã bãm ar ar amâ ijêx? ⁴Arkati, Metîndjwÿnh ta ne ar ijano bar tẽ. Nâm ar imâ,

—Gora ar memã Jeju kukràdjã ny'ã ajarê, ane. Nâm ã Metîndjwÿnh ar imã ane bar kabênkôt me akunimã 'ã idjujarênh mô.

Djâm me abêngôkre^a amã ikinh kadjy ne ba me amã Metîndjwÿnh'â idjujarênh mô? Kati, Metîndjwÿnh ta ar ikam kinh kadjy ne bar me amã 'ã idjujarênh mô ne kum ar idjâpênh iba. Tãm ne kute prîne ar ikabi. Kum ar idjâpênhkôt ne arÿm ar ipumû.

⁵Djã nã bãm ar ar amâ ijêx ne ar atãri ar amâ,

—Bep ar amexkumrêx, anen kam ar akãxã ar ajã ikabên ne? Arkati. Arÿm ne gar imex pumû.

Nâr djã nã bãm ar arik ar amâ ijêx ne pi'ôk kaprîre prâme ar amã ikabên jarê? Kati, Metîndjwÿnh ta ne prîne ar ikadjwÿnhbê ar ipumû.

⁶Nâr djâm wãkam ar aje ar imã ar imex jarênhmã ne bar tẽ? Kati, Kritu kute ar ijanorkôt ne bar tẽ.

Nâr djâm atemã me ja'ô kute ar imã ar imex jarênhmã ne bar tẽ? Kati, Metîndjwÿnh ta ne kute prîne ar ipumûnh. ⁷Kritu kute ar ijanor pumûnh nhiràm ne bar ren ar amã,

—Amrê ar ar imã mÿjja ngã,

—Gop ar ar imã apê, ane ne ren arÿm ikabêno ar akaty.

Nhym bep kati, ã ar ije anhÿr kêtê. Nã bãm ar akràn mã ar ajo iba. Mrãmri ne me nire kute amim kra karàkam o djuw mex pyrãk. Nã bãm ã ar ar ajo ibao ane.

⁸Ar imã ar akinh raxi. Kam ne bar prîne arÿm ar amã Metîndjwÿnh kukràdjã ny'ã ajarê ne ar itîn prâm kêtkumrêx ne. Djê ne ren me'ô kute ar ibîn prâm bar kam ren tu ate ikrãn mã ar amã Metîndjwÿnh'ã ajarê nhym kam me ren ar ibi. Nã bãm ã imã ar akinh rax ane.

^a2.4 Apÿnh me ô pyka djãri kunikôt ne me kunî bêngôkre. Kubêkã jakamê me kakrãtykmê me babêngôkremê ne me kunî: bêngôkre.

⁹Akmere ar, àpnhîre ar, ar akam ar idjâmkam ar idjâpênh raxja gar omû. Arngro'âmê akamâtkammê ar idjâpênhja pumû. Bir mÿkam? Ar ije pi'ôk kaprîre'ã ar ajwÿr kêt kadjy. Ar ije kâj bê ar amâ Metîndjwÿnh kukràdjâ ny'ã idjujarênhô iku'êkam ije pi'ôk kaprîre'ã ar ajwÿr kêt kadjy.

¹⁰Nã bãm ar akrànãm: ar ar ajo iba. Nã bãm ar ar ajo iba mexkumrêx ne ar ar ajo iba. Ar aje Jeju marja, ar ga ne bar akrànãm ar ar ajo iban ijaxwe kêtumrêx ne. Ar imrân mexkumrêx. Nã bãm ar katât amijo iba. Gar arÿm ar ipumû. Metîndjwÿnhdjwÿ ne arÿm prîne ar ipumû.

¹¹⁻¹²Nã bãm ar ar akunî:ô ikrakumrêx ne ar ar ajo iba, ne ar akunîmã ikabên jarên ar amâ,

—Kwârîk wân Metîndjwÿnh kanga kêt. Gora ar 'ã angrà tÿx, ane.

Ne kam ajte me kaprîmã kum,

—Kwârîk wân akaprî kêt. Metîndjwÿnh dja ajo kînh, ane.

Ne kam ajte ar amâ,

—Gora ar mã Metîndjwÿnh kabênkôt ar amijo aba rã'ã ne, ane.

Ar aje ã anhÿrkam godja Metîndjwÿnh ar akam kînhkumrêx.

Metîndjwÿnh ne ar kute gwaj bajo ba djwÿnh. Tãm ne amiwÿr gwaj bajuw. Tãm ne kute ar gwaj bapytâr ne ar kute gwaj bajo bamã amiwÿr gwaj bajuw. Gwaj bamextire ne ô pyka mexti:re, ô pyka ra:xkam ar babamã ne amiwÿr gwaj bajuw. Kadjy dja gar katât amijo aba, Metîndjwÿnh ar akam kînh kadjy.

Akubyn kute arkam amikînh jarênh.

¹³Arÿm ne bar ar amâ Metîndjwÿnh kabên jarê gar arÿm ama. Kam ne bar mã ar akam ikînhkumrêx ne Metîndjwÿnhmã amikînh jarê. Djã nã gãm ar mar kajgo got? Kati, nã gãm ar tu markumrêx. Nã gãm ar anhôkre kadjwÿnhbê,

—Djãm mebêngôkre kabên got? Kati, Metîndjwÿnh kabên ne ja, ane. Kôt ne gar arê. Metîndjwÿnh kabênkumrêx ne ja. Metîndjwÿnh ne arÿm ta kabêno katât ar akrã dja, kam ne gar arÿm amrân mexkumrêx mō.

¹⁴Ê, akmere ar, àpnhîre ar, djãm wân Texarônîkakam, ar anhô krôkambit ne me ar ar ajo bikênhô ba? Kati, mekbê idjaerkamdjwÿ ne me ô krôkam me ar ar o bikênhô ba, pykabê Djudêjakam. Mekbê idjaer kwÿ ne ar arÿm Kritu Jejukôt aben pydji. Nhym me kute Jeju mar kêt ar aro bikênhô ba. Gar ar anhô krôkam me kute ar ajo bikênhja pumû. Aprakamã ar aje amim Metîndjwÿnh marja ne me arîk ar me ajo bikênhô ba.

¹⁵Amrêbê ne mekbê idjaer ta ar Metîndjwÿnh kabên jarênh djwÿnh paro ban kam arÿm Bênjadjwÿr Jeju bîn kam arÿm ar badjwÿ ar ijo kurê djwÿnh ne. Arÿm o Metîndjwÿnhmã ngryk jadjân me kunîkam amikrà ar o ba.

¹⁶Mã ne mekbê idjaer mekam amikrà on? Bir, nã bãm ar ije me bajtem, me jamã Metîndjwÿnh kabên jarênhô itêm nhym kute me utârmã nhym mekbê idjaer mã: ar ikukrà ar o ba. Godja me ã anen arek Metîndjwÿnhmã ngryk jadjâro tē:n kam arÿm Metîndjwÿnhmã ngryk jadjâr mex ne. Nhym kam arÿm Metîndjwÿnh prîne me axwe pân meo ajkê.

Kute aro amak'ã kute arkum amijarênh.

¹⁷Akmere ar, àpnhîre ar, nã bãm ar ar akurũm itẽm ngrire ne ar ajo ama: ne. Ne kam ar ije me 'uwtĩ tũm pyræk. Nã bãm ar ar ajo aman iba. Ne te ije inhỹtã ar apumũnh prãme. ¹⁸Ne te akubyn ar awỹr imõr prãme. Ibê Paur ne ba te akubyn ar awỹr itẽmmã ikràn ikràn ikrà nhym Xatanaj mã: ar ikukrà.

¹⁹⁻²⁰Ê, Bẽnjadjwỹr Jeju akubyn bõxkam, kuka kõnh gwaj badjãmkam, nhym dja bar mex jarẽ? Ar ga. Ar ga dja bar ar amex jarẽ ne kum,

—Be, ar ja ne ar mexkumrêx ne ar ba. Arỹm amar tỹx ne, ane. Be, ar ga dja bar ar ajo idjãmra mõi. Ar ije kum ar ajarênhmã ne bar kam ama ne. Mỹjbê ne ar ikĩnh djã? Ar ga. Texarônikakam ar ga ne gar abê ar ikĩnh djã. Nhym Metĩndjwỹnhdjwỹ dja ar imã ar amex jarẽ bar kam ikĩnhkumrêx ne.

3 ¹⁻²Nã bãm axwe ar akam idjumar ne kam inhõkre kadjwỹnhbê amim, —Birãm ijamak dja ibĩ, ane. Kam ne ba ar awỹr Ximoxi janon kam ate: krĩbê Atẽnakam dja. Gwaj bakamy Ximoxi ar ikõt Metĩndjwỹnhmã àpênh ba.

Tãm ne bar ar awỹr ano. Kute memã Kritu'ã ujarênh ny jarênhõ baja tãm ne bar ar awỹr ano. Kute ar amã tỹx jadjãr ne kute ar amã kabẽn jarênhmã ne kute ar amã,

—Arỹm ne gar tu Jeju markumrêx ne. Gora ar 'ã angrã tỹx, anhỹrmã ne bar ar awỹr ano nhym tẽ. ³Birãm me kute ar ajo bikênh gar arỹm aje Jeju kanga karõ ne bar ar awỹr Ximoxi jano nhym tẽ, kute ar amã tỹx jadjãrmã ar awỹr ano nhym tẽ.

Be, mrãmri godja me arĩk ar ba gwaj bajo ajkê. Arỹm ne Metĩndjwỹnh gwaj bajã amim karõ. Me arĩk ar ba kute me baje Jeju maro bikênhmã ne amim me bajã karõ, me kute me bajo bikênh gu me Jeju'ã bangrã rã'ã jabej amim me bajã karõ. Gar arỹm ama.

⁴Ar akam ar idjãmkam ne bar arỹm ar amã arẽ. Anhỹr djwỹnhrà m ne bar ar amã arẽn ar amã,

—Gora ar ar ikabẽn ma. Godja me ar ar ajo bikênhõ ba, ane. Be, kõtõ. Nã bãm tu kõnh kum irkumrêx gar arỹm ama.

⁵Kam ne ba ar awỹr Ximoxi jano. Ije ar amar prãm kute ibĩn kajgo ne ba ar awỹr ano, ije marmã. Ar aje Jeju kanga kêt jabej ne ba ar awỹr ano. Ar 'ã angrã rã'ã jabej ne ba ar awỹr ano. Nã bãm inhõkre kadjwỹnhbê amim,

—Birãm arỹm godja Xatanaj arkum ar kute Jeju kangamã arkum 'ã apnê nhym arỹm ar kanga. Nhym arỹm ar idjãpênh, ar ije arkum arênhja arỹm kajgo, ane. Nã bãm ã amim ikabẽn jarênhõ ane.

Ximoxi kute ar mex jarênh.

⁶Nhym bep kati. Nã bãm ar ar awỹr Ximoxi jano nhym ar awỹr tẽn ar akurũm tẽn bõx ne arỹm ar imã ar ajarênh mextire ne. Bar kam ikĩnhkumrêx ne. Nã gãm ar tu aje Jeju markumrêx ne 'ã angrã tỹx nhym omũn bõx ne ar imã arẽ bar ikĩnhkumrêx. Nhym ajte ar amã me abê jarẽ. Nãm ar imã,



(Texarônika kumrêx 3.8)

—Onĩj ar ar ajo ama ne. Ar kute ar apumũnh prãmã. Ar kute ar apumũnh prãm gar gadjwỳ aje ar omũnh prãm kute aben pyræk, ane. Be, nãm Ximoxi ã ar ajã ar imã anen ã ar ajarêho ane.

⁷Be, akmere ar, àpnhĩre ar, ar aje Jeju mar tỳx ne mã 'ã angrà rã'aja ne omũn akubyn bõx ne ar imã arê. O ar imã ar ikĩnh jadjà. Nãm me ja ar ijo ajkê. Ar ijo ajkê bar idjumar punure ne kam irerekre. Nhym bep ar ga ne gar ar imã kĩnh jadjà. ⁸Jakam ne bar arỳm ajte itỳxkumrêx ne. Ar aje Bẽnjadjwỳr mar ne 'ã angrà tỳx rã'ākôt ne bar arỳm ajte 'itỳx ne.

⁹Jakam dja bar Metĩndjwỳnhmã ar akam ikĩnh jarê. Mỳjkôt ne bar ikĩnh? Bir, ar akam. Ar aje mar ne 'ã angrà tỳxkam ne bar ikĩnhkumrêx ne kam gwaj Batĩndjwỳnhmã amikĩnh jarê. ¹⁰Akamãt kunĩkôt arngro kunĩkôt ne bar amikadj Metĩndjwỳnh ma:ro iku'ê. Ar awỳr ar itêm, gwaj baje aben nhýtã aben pumũnh bar ije õbê ar amã Metĩndjwỳnh kabên jarêho ino rer kêtja jarênh gar aje prĩne amim marmã. Kam ne bar amikadj Metĩndjwỳnh ma:rbito kuma.

¹¹Gora gê gwaj Babãmbê Metĩndjwỳnhmê gwaj banhõ Bẽnjadjwỳrbê Jeju, gora gê ar ar ijano bar kam wãm ar awỳr tẽ.

¹²Mrãmri ne gar arỳm amã aben jabên ar aba. Gê Bẽnjadjwỳr abenã ar amã karõ gar amã aben jabê rax. Amã aben jabê rax ne ar abeno aba. Ne ar amã me kunĩ jabê, ar amã me kunĩ jabê rax ne ar aba, ar amã me abê raxo kute ar imã ar ajabê ja pyræk. ¹³Kam dja Metĩndjwỳnh arỳm ar ajo tỳx ne, gar arỳm 'ã angrà tỳx ne. Nhym kam Jeju akubyn bõxkam gar

ajaxwe kêtkam amextire ne ar aba. Gwaj banhõ Bênjadjwÿr Jeju dja õ me ja kunõ bôx. Õ me ja kunõ bôx gu me bajaxwe kêtkam me Babâmbê Metîndjwÿnh kabem bakumex. Gu me baje Jeju mar bakunĩ ajmã bakute kêt ne Metîndjwÿnh mexo bamexkumrêx ne dja, me Babâm kuka kônã dja.

Me kute katàt amijo bao Metîndjwÿnh kînhmã.

Rô 12.9, 13.13; Kor 3.5

4 ¹Be, akmere ar, àpnhîre ar, bar prîne arÿm ar amã arê gar arÿm ama. Ar aje Metîndjwÿnh kabênkôt ar amijo aba nhym ar akam kînh kadjy ne gar arÿm ama. Mrâmri ne gar arÿm ã anhÿr ar aba. Ba kam ar ije ajte ar amã arênhmã. Bênjadjwÿr Jeju djô'ã ajte ije ar amã arênhmã.

—Arek ar Metîndjwÿnh kabênkôt ar amijo aba rã'ã ne. ²Amrêbê ne bar ar amã ikabên jarê ga arÿm ar ama. Bênjadjwÿr Jeju kabênkôt ar amã ikabên jarê gar arÿm prîne ama.

³Metîndjwÿnh ne arÿm ar ajã amim karõ. Ar Metîndjwÿnh mexo amextire ne ar aba ne ajaxwe kêt ne ar abamã ne ar ajã amim karõ. Kam dja gar aprõ prãm kêt ne abenbê prõo adjâkînh kêt ne amextire ne ar aba. Nhym me nidjwÿ mjên prãm kêt gar arek ar aba.

⁴⁻⁵Kam dja gar aprõ djwÿnh'ÿrbit tu abakumrêx ne ar o aba ne amexkumrêx. Nhym bep me kâtãm, me kute Metîndjwÿnh mar kêt me tãm ne me prõ prãmcam, kurêkam tu arîk prõ'ÿr ba. Nhym bep kati, kwârîk wãnh mekmã nõ. Nhym bep ar ga dja gar aprõ djwÿnh'ÿrbit aban 'ã apÿnh ne. Kwârîk wãnh gar krô'ã meo aprõ kêt. Kwârîk wãnh gar krô'ã meo amjên kêt. Ne kam arîk ar aba kêt. ⁶Kwârîk wãnh akamykam amikrà ar o aba kêt ne kubê prõo adjâkînh kêt. Mÿkam? Bir, Bênjadjwÿr Jeju godja mÿjja ja kunõ pãnh ne. Ë, kute o pãnh kêtri ne bar anhÿr djwÿnhràr arÿm prîne ar amã arê gar ama.

⁷Be, djãm gwaj arîk ar baba kadjy ne Metîndjwÿnh amiwÿr gwaj bajuw? Kati. Arkati, gwaj bamextire ne katàt bamrãnh kadjy. Katàt me bamrãnh ne baje abenbê prõo badjâkînh kêt kadjy ne Metîndjwÿnh amiwÿr gwaj bajuw.

⁸Dja me'õ kabên ja mar prãm kêt djãm mebêngôkre kabên dja me'õ mar prãm kêt ne? Kati, Metîndjwÿnh kabên dja mar prãm kêt. Metîndjwÿnh ta kute ar amã ta Karõ mex janor tãm dja me'õ mar prãm kêt.

⁹Nã gãm ar amã aben jabê. Ar aje Jeju marja ne gar amã aben jabê. Metîndjwÿnh ne ar amã arê gar kam amã aben jabê. Kam dja ba ar amã 'ã pi'òk no'òk kêt ne. ¹⁰Nã gãm ar amã aben jabê, Matenikam ar kute Jejukôt abeno kamy kunĩmê ne gar amã aben jabê. Kam dja ba ar amã, —Akmere ar, àpnhîre ar, gora arek ar ã anhÿr ar aba rã'ã ne, ane.

¹¹Ba ajte ar amã arê,

—Gora ar abenkam akabôt katin ar aba. Adjâkrê kêt ne ar aba. Kwârîk wãnh kikrekôt mör ne mÿjja pumũnh ne mÿjja mar ne arênhõ aba kêt. Gora anhikrao adjâpênã aba. Tãm ne ba arÿm amrêbê ar amã arê. ¹²Bir, mÿj kadjy dja gar ar

adjâpênh aba? Bir, me kâtâm kum ar akînh kadjy. Kadjy dja gar ã ane. Mÿkam ne gar akwÿ ar adjâpênh kêt ne aba? Ar apê ne ate amim mÿjja by ne me 'wÿr kêt.

Jeju akubyn bôxmã.

Kô k 15.51

¹³Ë, akmere ar, àpnhîre ar, ba ajte ar amã arê, ar aje prîne mar kadjy. Me arÿm tyk tûmja dja ba ar amã arê gar ama, ar akaprí kêt kadjy. Nhym bep me kute Jejukam amak kêtja dja me mrãmri kaprí. Me ja'ô dja ty nhym me ja tu kapríkumrêx, tyk nhijukri Jeju'ÿr bôx kêtka. Nhym bep gu me ba dja gu me ã bakaprí anhÿr kêtikumrêx ne.

¹⁴Jeju tyk ne akubyn tîn. Tãm ne gu me arÿm tu amim kamnhîxikumrêx ne. Dja me tyk ã Jejukôt akubyn tîn ane. Tãm dja gu me kuman tu amim kamnhîxikumrêx ne. Mrãmri godja Metîndjwÿnh me tyk tûmja Jejumê ro'ã meo mô, me kute amim Jeju mar tyk tûmja dja Jejumê ro'ã meo mô. Me kute tu amim Jeju markumrêxja, me tyk tûmja, me tãm godja Metîndjwÿnh Jejumê ro'ã meo mô.

¹⁵Ë, Bênjadjwÿr ne ar imã arê bar ô'ã prîne ar amã arê, katàt ar amã arê. Gu me batînja dja gu me me tykmã wa kêt. Bênjadjwÿr akubyn bôxkam dja gu me batîn rã'ãja me tykmã wa kêt.

¹⁶Bênjadjwÿr ta dja kâjkwa kurûm ruw ne kâj bê me bamã akij ne amiwÿr me bajuw. Kadjy mrân timer dÿwÿnh nhô bênjadjwÿrmê dja ar me bamã akij ne Metîndjwÿnh nhô mÿjja kute poti nhôkre pyrâk kakô. Nhym kam me kute amim Kritu mar tyk tûmja, me kumrêx tyk ne pykakam nôrja dja me kumrêx pyka kurûm katon wabi. Dja me akubyn tîn ne katon wabi.

¹⁷Gu me batîn rã'ãjamê dja gu me baro'ã wabi. Me batîn ne ar babaja dja gu me batîn ne wabi. Nhym bep me kumrêx tyk ne pykakam nôrja dja me kumrêx akubyn tîn ne kam me batîn rã'ãjamê abenã bôx. Gu me arÿm baro'ã Bênjadjwÿr'ÿr wabi. Metîndjwÿnh godja me baro'ã me babyn Bênjadjwÿr'ÿr me bajo wabi. Kakrâkam dja me babyn Bênjadjwÿr'ÿr me bajo wabi. Gu me kam Bênjadjwÿr Jeju kajpa, kôk djâbêrkam dja gu me kajpa nhym kam kâjkwamã me bajo mô. Gu me kam kôt ar baba. Ar baba rã'ã: ne. Dja gu me Bênjadjwÿrkôt ar babao ino rer kêt mex ne ar baba. Ar baba rã'ã ar baba.

¹⁸Kam dja gar abenmã ikabên ja jarênho aban o ar akapribê abenmã kînh jadjà.

Meo bikênhdjã nhô akati'ã ujarênh.

Mat 24.29; Mak 13.26; Ruk 21.25, A Ped 3.10

5 ¹Ë, akmere ar, àpnhîre ar, mÿj kadjy dja ba ar amã 'ã pi'ôk no'ôk ne? Mÿj mytyrwÿ 'ôkam nâr mÿj akati 'ôkam dja meo bikênh djã nhô akati me'ÿr bôxmã ne ba ije 'ã ar amã pi'ôk no'ôkmã? ²Godja me aêrbê Bênjadjwÿr Jeju kute meo bikênh djã nhô akati me'ÿr bôx. Arÿm ne gar prîne ama. Me aêrbê. Akamâtkam me âkînhî me aêrbê me ûrkwãmã ngjêx ne kute mekbê mÿjjao âkînh ba. Dja meo bikênh djã nhô akati ã me aêrbê me'ÿr bôx ane.

³Kute me nire kra àn tokrykam kute kubê amijo bipdjur kêt ne kubê prôt kêtja pyrâk. Mrâmri godja meo bikênh djâ arÿm ã me'ÿr bôxkumrêx o ane, nhym me kubê amijo bipdjur kêtumrêx. Dja me abenmã,

—Be, arÿm ne gu me badjumar mexkumrêx ne ar baba. Godja mÿjja'ô ajmã me bajo kêtumrêx ne, ane. Me kute abenmã arênh rã'ã nhym me aêrbê meo bikênh djâ nhô akati me'ÿr bôx, Bênjadjwÿr kute meo bikênh djâ nhô akati me'ÿr bôx. Godja me'ÿr bôx nhym me kubê amijo bipdjur kêtumrêx ne 'ô kubê kator kêtumrêx.

⁴Nhym bep kati, akmere ar, àpnhÿre ar, djãm àtykri ar amrãnh got meo bikênh djâ nhô akati ar ajaêrbê ar awÿr bôxmã. Kute me àkĩnhÿ me aêrbê me ùrkwã'ÿr mrãnh ne ngjêx pyrâk. Nhym bep kati, djãm ar ajaêrbê ar awÿr bôx kêtumrêx ne. Me mÿ ja'ÿrbit dja bôx. Me arík ar ba'ÿr dja bôx.

⁵Nhym bep kati, ar ga ne gar a'ukam mrã, ne arngro'ã mrã. Nã gãm ar Metĩndjwÿnh kabênkôt ar amijo aban kam kute a'uri ar amrãnh pyrâk. Gwaj ba ne gwaj akamãtkam baba kêtumrêx, àtykri baba kêtumrêx. Nhym bep me arík ba ne me kute àtykri me ba pyrâk.

⁶Kam dja gwaj a'ukam bamrãnhja, arngro'ã bamrãnhja 'ã bano tÿx rã'ã ne babibãnh kêt ne ar baba. Nhym bep me arík ar baja, àtykri ar baja dja me wãnh arík ar ba. Nhym bep gwaj ba dja gwaj ã anhÿr kêtumrêx ne ar baba. ⁷Nhym bep me Jejubê jãm krãja ne kute arík akamãtkam me ba pyrâk. Nhym me arík ar badjwÿ ne me kute me bibãnhkam arík akamãt kô tykkam ba pyrâk.

⁸Nhym bep kati, a'uri gwaj bamrãnhja dja gwaj bajaxwe kêtumrêx ne ar baba. Ê, dja gwaj amijã bano tÿx. Xatanaj ne kute gwaj bajaxwe'ã gwaj bamã àpnênh prãmumrêx. Kam dja gwaj amim Jeju mar 'ãno djan arek bamã me abê. Kute mrâmri ne me kute ngônho kubêkà jangjênh nhym me te kute me'ã kamjÿrja pyrâk. Dja gwaj ã baje amim Jeju mar 'ãno badjãm ne bamã me abêo ane. Nhym kam Xatanaj te gwaj bajaxwe'ã gwaj bamã apnê. Gwaj Jeju 'ãno djan amiwÿr kam ama. Kute mrâmri ne me kute ngônho krãdjê tur nhym me te kute kôo me ikwÿr kajgo ja pyrâk. Dja gwaj ã baje Jeju 'ãno badjãm ne amiwÿr kam amako ane nhym kam Xatanaj te gwaj bajaxwe'ã gwaj bamã apnê.

⁹Djãm Metĩndjwÿnh me bakam ngryk ne kute me bajo bikênh kadjy ne amijo me bapytãn amim me bajã karô? Kati, kute me bapytãmã ne me bajo amiptã. Me banhô Bênjadjwÿr Jeju Kritu ta ne me bapytãn ar me bajo ba.

¹⁰Ta ne me bapãnh tyn ajte me bakadjy tĩn ne. Gu me kôt bakunĩ batĩn ne. Dja gu me arÿm batyk jabej nàr kon batĩn rã'ã jabej mrâmri dja gu me bakunĩ ajte Jejukôt batĩnkumrêx ne. ¹¹Me akubyn tĩn dja gar mã abenmã arê. Ne mã o abenmã kĩnh jangij ne o abenmã tÿx jangij. Arÿm ne gar ã ane. Jakam dja gar mã ã anhÿr atêm rã'ã.

Akubyn ajte arkum 'ã karô.

Gar 6.6; Xim k 5.17

¹²Ê, akmere ar, àpnhîre ar, dja gar prîne ar kute Jeju nhô me jao ba djwÿnh kabên ma. Ar ja ne ar prîne ar ar ajo djuw mexo ba, Bênjadjwÿr Jeju kabênkôt ar ar ajo djuw mexo ban ar amã àpênh ar ba, ne ar ar akreo ba. Kam dja gar prîne ar kabên ma. ¹³Gora ar prî:ne ar kabênja man amã ar abên amã ar kînh. Ar akrànã ar amã àpênhkam dja gar amã ar kînhkumrêx ne ar aba. Gora ar akunî abenmã adjàkrê kêt ne amã aben jabên ar aba.

¹⁴Ê, akmere ar, àpnhîre ar, ba ajte ar ar amã ikabên jarê. Godja me kum ukanga gar mekmã kum,

—On adjàpênh ar aba. On mÿjja kupê, ane.

Godja me kaprî gar memã kînh jangjê. Godja me kute amim Jeju mar rerek gar mekmã kum,

—On amim Jeju mar mex ne 'ã angrà tÿx, ane.

Gora ar akunî abenmã akabên mexbit jarên abenmã adjàkrê kêt ne ar abeno aba.

¹⁵Godja me'ô ar ar ajôkam ar amikràò ba ga amipãnh o abikênh kêt ne. Tu ate akrân ar aba. Godja gar abenkam adjukaprîn ar aban me kunîkam adjukaprîn ar aba.

¹⁶Gora ar akînh rã'ã rã'ã.

¹⁷Gora ar Metîndjwÿnhmã akabên 'ãno dja.

¹⁸Gora ar myt kunîkôt Metîndjwÿnhmã kum,

—Aje imã mÿjja janorja ne mexkumrêx. Ba akam ikînhkumrêx, ane.

Adjumar mexkam nâr apunukam nâr abikênhkam nâr mÿjja kute ajo bikênhkam dja gar kum ã amijarênho ane ne 'ãno dja. Ar aje mÿjja kunîkam akînh ne aje kum amijarênhmã ne Metîndjwÿnh ar ajã amim karô. Nãm ã ar aje Kritu Jeju mar'ã amim karôo ane.

¹⁹⁻²⁰Dja me'ô Metîndjwÿnh Karôkôt ar amã mÿjja'ô jarê gar aprÿ kêt. Kwârîk wãnh Metîndjwÿnh Karô ar amã kabên'ô jarê gar ate akrã kêt. Dja gar ate akrã nhym arÿm Metîndjwÿnh Karô ar amã kabên kêt ne. ²¹Dja gar prîne me kunî kabên kabi. Dja me'ô kabên mex jabej gar tu kabên markumrêx ne kabênkôt ar amijo aba. Dja me'ô kabên punu gar tu ate akrã.

²²Be, gora ar rûm apÿnh mÿjja punu djari kunîmã akre rax.

²³Gê Metîndjwÿnh ta kute me bamã umar mex jarênh djwÿnh prîne amim ar amã mex jadjà gar kam ta mexo amexkumrêx ne ar aba. Me akunî dja gar anhî pÿnhkôt amexo tuknîn ar aba. Dja me banhô Bênjadjwÿr Jeju Kritu akubyn tê gu me bamextire ne ar baba. Gu me bajaxwe kêt ne ar baba. Ajmã bakute kêt ne ar baba. Badjumar djãmê banhîmê bakarômê ajmã bakute kêt ne ar baba. ²⁴Metîndjwÿnh ta ne amiwÿr ar ajuw, ta godja ar amã mex jadjà. Mrãmri godja ar amã mex jadjà. Metîndjwÿnh ne kabênkumrêx. Mrãmri dja ar amã mex jadjà gar amexkumrêx ne ar aba.

²⁵Ê, akmere ar, àpnhĩre ar, ar badjwỳ dja gar Metĩndjwỳnhmã ar ijarẽ.

²⁶Ar aje Jejukôt abeno akamy dja gar idjô'ã aben pa krij.

²⁷Ba ar amã arẽ, Běnjadjwỳr kaběnkôt ar amã arẽ. Ije ar amã pi'ôk no'ôkja dja gar akamy kunĩmã arẽ.

²⁸Gê gwaj banhõ Běnjadjwỳr Jeju Kritu ukaprĩkôt prĩne ar ajo djuw mex. Tãm ne ja.